



Kamis, 06 Jan 2022
Ogen: Yakob 4:13-15



Ersukuten Man Tuhan



Anak sekolah erpenungkunen man guru, kalak si sakit erpenungkunen man dokter. Bagenda me kearusen geluh simaba kiniulin. Tangkas pe maka kalak sierpenungkunen la papak i bas geluhna. Lit pepatah nina "malu bertanya sesat di jalan."

Kita anak-anak Dibata, tading i bas doni enda. Doni enda melala si mereken tawaren dalam geluh. Tapi mekatep dalam e banci erbahanca kita papak. E maka perlu sinuduhkan dalam. Ise metehsa dalam si payo? Bage pe ise si man sungkunen? Sada gelar e me Tuhanta Jesus Kristus. Ngaku me kita maka manusia erbatas i bas pemeteh, gegeh ras sidebanna. Tapi Dibatanta la erbatas, e maka biak ngeluh si arus sipebelin e me ersukuten/erpenungkunen man baNa.

Kitab Jakup tangkas mereken perteget segelah ola meganjang rukur ras ngerana. Kalak si ersura-sura berkat ku kuta sideban, tading sada tahun i je, erdahin erbinaga tapi enggo ipastikenna ngaloken untung si mbelin. Ise kin banci mereken kepastin geluh. Sada pe manusia la ngasup mastiken kai si jadi sada wari ku lebe. Bage me pe bas geluh enda, erbage-bage usaha sinilakoken segelah banci kegeluhenta sejahtra, tapi i babo usaha e lit kuasa Dibata. Orang tua mekatep erbelas wari pepagi la warinta, e maka kai sibanci silakoken wari enda elah ilakoken janah kai si lit i bas kita i bas paksa enda pakekenlah alu payo segelah ula ketunduken. Secara khusus i bas ngelola perduiten si lit. Ndehara si pentar ngaturken perduiten jabu alu mehuli. Ndehara me bendahara tengah jabu, adi bendahara e pentar tentuna perduiten e pe mehuli perdalanna. Jadi mari sipakeken perduiten e tepat guna segelah la ketunduken, janah kegeluhenta bas ndalani tahun enda pe mehuli. Inget tetap ersukuten man Tuhan i bas kerina kecibal geluhta jabuta, malem ateta pe.